

Priera

O Patri miu, ranni, abbuntatusu,
ca nni criasti cu tantu e tantu amuri
e nni rasti na terra mmaculata
riciennu a ognarunu: ti la curi.

Ma nui pirdemmu ogni virtù e cuscenza
agiennu cuomu figghi sdisinzati
e la sprimemmu raveru finu all'uossu
cumminti r'essiri cuomu li scinzati.

E ntrirucemmu nto munnu la superbia,
la disonestà e la furbizzia
assuggittannu li frati li cchiù misiri
e trattannuli peggju ra munnizza.

Ruoppu tanti e tanti malifatti
n'alliemmu c'u mali cchiù putenti,
ora iddu stissu nni sta viniennu contru
cavannuni l'uocchi e puru a menti.

E ora, all'impruvvisu chi nni capita
nu n-virus tantu nicu ca n-si viri
ararmau na verra n-tuttu u munnu
faciennu danni ca mancu si cci criri.

Senza bbummi e mancu carrarmati,
senza pistoli e mancu lupara,
senza taliari a nuddu tinti o buoni,
si simu puarieddi o miliunara.

Sta siminannu morti e malatia
e avi nu nnuomu stranu appiddaveru
"Curuna Virus" e gghieri cuomu riri
ca vò rignari nta lu munnu interu.

I muorti si cuntanu a migghiara
e i cimiteri nun zunu cchiù capienti,
li cascì su' mittuti tutti n-terra
ncatastati cuomu fussi nenti.

O Diu, chistu è nfiernu tali e quali
e nnu nnu miritamu veramenti,
m'a to' misericordia è granni assai
e lu sapimu quantu si' climenti.

Scinni n-terra ca sempri figghi simu,
puru si stravacanti e risgraziati,
janzi lu sai c'avimu cchiù bisuognu

r'essiri accugghiuti e pirdunati.

Eccu Signuri, Tu viri e si' piatusu
ca n-funnu n-funnu vulissimu canciari.
Amàrinni tra nui chi nni custassi?
E mmeci cumminamu sempri guai.

La Matri ca nni rasti è ncutumata
ri tantu mali ca nni succiriu,
fallu pi idda ca sempri fu fireli
e Tu agisci sempri cuomu Diu.

Gesuzzu ri nna cruci ti priau:
"Pirdunali ca n-sanu socchi fanu"
Eccu, Diu, ascuta la so' vuci,
c'a mia è ddebbuli e arriva ri luntanu.

Graziella Di Salvo Barbera